

Baselgias chantunalas – tranter sutgas e bauns

Iniziativa cunter la taglia da baselgia per persunas giuridicas

DA CLAUDIA CADRUVI / ANR


■ **Las baselgias chantunalas dal Grischun sa chattan en fetgas. Ellas han da batter sin dus mauns: Ils Giuven liberals vulan privar ellas da lur entradas. E l'uvestg da Cuira vul limitar lur pussanza.** Il 2014 decida il pievel davart l'iniziativa dals Giuven liberals cunter la taglia da cultus. Vegn l'iniziativa acceptada tutgi sin il viv. Il Corpus Catholicum perda 90 pertschient da sias entradas. La baselgia chantunala reformada perda 30 pertschient.

Sche las baselgias chantunalas avessan da batter be cunter l'iniziativa na stuessan ellas betg temair, pertge era la regenza s'exprima a moda clera a favur dal sistem odiern. Privlus è dentant l'agir da l'uvestg da Cuira.

L'agir da l'uvestg

L'uvestg *Vitus Huonder* pleda ni pro ni contra l'iniziativa. A las medias na dettia el da preschent nagin scleriment, di ses pledader *Giuseppe Gracia*. Sulet ina communicaziun vedra sin la pagina da l'uvestgieu explitgescha sia tenuta: «Cartents catolics èn obligads da sustegnair la baselgia cun lur meds persunals e materials.» Tar la taglia da cultus per persunas giuridicas na sa tractia quai betg da daners da cartents, mabain da daners da l'economia. Perquai na saja questa taglia betg ina dumonda confessional, mabain ina dumonda politica.

Strusch gidaivel è era l'agir episcopal pertutgant il vademecum che descriva la collavuraziun tranter baselgias chantunalas ed uvestgieus. Paucs dis suenter che la regenza grischuna ha communitgà l'avust ses sustegn a favur da la taglia da cultus vegn enconuschent che Huonder vul sco emprim



Placi Berther

uvestg svizzer realisar il vademecum. Tenor l'interpretaziun da l'uvestgieu da Cuira sa tracti tar il vademecum da directivas. Il president dals uvestgs svizzers *Markus Büchel* ha rectificgà ch'il vademecum cuntegnia recumandaziuns.

Las baselgias chantunalas èn pia tschincladas dals Giuven liberals e da l'uvestgieu da Cuira.

Thöny: «Attatga sin la democrazia»

«L'iniziativa dals Giuven liberals è main dramatica», di *Andreas Thöny*, president da la baselgia evangelica reformada dal Grischun. La finamira dals iniziants saja gea da distgargiar l'economia. Questa finamira na cuntanschian ils iniziants betg damai che



Andreas Thöny

la gronda massa dals mastergnants na paja gnanca taglia da cultus.

«Dapli brisanza» possedia il vademecum episcopal. Lez saja ina attatga frontala sin la democrazia e veglia dismetter la noziun «baselgias chantunalas», di Thöny. Per gliez duvrassi ina midada da la costituziun. L'autonomia da las baselgias chantunalas en Svizra saja ina spina en ils egl da Ruma e da l'uvestgieu da Cuira che veglia sez decider davart ils daners dal Corpus Catholicum. La baselgia reformada n'enconuschia betg quests problems. «Nus s'accordain intern tgi che ha tge cumpetenzas», di Thöny.

En cas che l'iniziativa vegn prida stuess ins per exempel stritgar il sustegn per la pastoraziun en spitals, per la chasa da dunnas u per la Crusch

blaua. Era la renovaziun da baselgias vegness smesada.

Liquidar il Corpus Catholicum

En ina situaziun fatala sa chattass cunzunt il Corpus Catholicum en cas d'in «gea» a l'iniziativa. «Dus u trais onns pudessan nus viver da las reservas», di *Placi Berther*, president executiv da la baselgia chantunala. Suenter fissi probabel da liquidar l'entira organisaziun. Ina nova taglia tenor il muster da la baselgia chantunala reformada na saja nagina opziun. «Da vegnir oz cun ina nova taglia na va betg.»

Ils Giuven liberals opereschian cun posiziuns pauschalas che cuntegnian manzognas. Mo ina pitschna part da las firmas e dals mastargners grischuns sajan persunas giuridicas, explitgescha Berther. La gronda part na mussia ora nagins gudogns e na stoppia gnanca pajar taglia da cultus.

Berther ha ina tscherta chapientscha che l'uvestg na s'exprima betg tar l'iniziativa.

Conciliant sa mussa il president dal Corpus Catholicum era areguard ina midada dal num da las baselgias chantunalas: «Ins pudess guardar sch'i dess ina schliaziun.»

Berther:

«I va per la pussanza»

Ma davart las stentas da limitar ils dretgs da la baselgia chantunala di Berther: «Ins vesa che l'uvestg vul metter il maun sin las entradas da la baselgia chantunala.»

Ils uvestgieus hajan basegns finanziaals ch'els na vegnian betg da covrir. I giaja pia per la pussanza e la fin finala per la dumonda tgi che po decider. Che l'uvestg avess en l'avegnir adina il davos pled en la baselgia chantunala fiss ina midada radicala che sclaudia process democratics.

«Las dioceses pudessan tschentiar autras prioritads», finescha Berther. «Per exempel rimnar lur nursas e betg agir che la glieud scappia ord baselgia.» Lura dessi era dapli entradas da taglia per las baselgias.

Mo paucs pajan taglia da cultus

Il cussegl grond s'occupa l'october da l'iniziativa dals Giuven liberals. L'onni proxim vegn il pievel en nomina: Ils votants grischuns decidan sche persunas giuridicas han vinavant da sbursar la taglia da cultus – u betg. Radund 8 milliuns taglia da cultus incassescha il chantun mintg'onni da las persunas giuridicas. Ils catolics survegnan 54,3 pertschient dals daners, ils reformads 45,7 pertschient.

En cas d'in «gea» giess la nova dis-

posiziun en vigur il 2015. Gliez munta che las persunas giuridicas avessan be pli da pajar taglia da cultus per il 2014.

Tenor indicaziuns da la regenza datti radund 12 000 persunas giuridicas en il Grischun. 48 pertschient da quellas na pajan nagina taglia da cultus. 38 pertschient pajan tranter 200 e 400 francs l'onni. La gronda part dals mastergnants grischuns lavuran sco independents e n'èn pia gnanca persunas giuridicas.